

# Listovi...

## Listovi gračaničkog kalendara

Od 10. 5. do 16. 9. 1998. g.

9. 5. 1998.

Hoće li zagađivači Spreče ikada pred sud...?

Puštanjem u pogon Fabrike sode i još nekih hemijskih industrijskih kapaciteta po Lukavcu označen je početak ponovnog ekološkog umiranja rijeke Spreče i plodne ravnice oko te rijeke. Uzaludni su bili protesti i vapaji za spas sprečke doline. Gračanica je u tome bila najglasnija zato što su, ne pitajući nikoga, otrovni đeriz pustili kroz njene bašte i livade i drsko ismijali "glas razuma" koji je dolazio od onih "ispod Lukavca". Veliku medijsku i političku halabuku koja se oko toga bila podigla naglo je stišao Predsjedavajući Predsjedništva BiH Alija Izetbegović, koji je simboličnim puštanjem u rad Fabrike sode Lukavac i obilaskom ostalih tamošnjih postrojenja, možda i nehotice, ovjerio svu tu rabotu i na neki način blagosiljao zagađivače.

Sve je, dakle, ostalo u "porodici".

Velike političke poene dobili su lokalni moćnici, zagađena Spreča teče "ko i prije", svi su sretni, nasmijani i zadovoljni, samo vlasnici zemlje sionice u Sprečkom polju gledaju odakle je vedro...

Na sjednici Opštinskog vijeća Gračanica, održanoj 6. 5. 1998. godine, usvojen je prijedlog Omera Hamzića da Opština otvori kancelariju za pravnu pomoć vlasnicima parcela pored Spreče kojima je jedino preostalo da putem redovnih sudova traže adekvatnu nadoknadu za svoju upropaštenu zemlju. Privatna svojina je neprikosno-

"Listao"  
Omer HAMZIĆ

vena, ali je pravda spora - u ovoj zemlji često i nedostižna. Uostalom, ovom narodu počinjene su i gore nepravde. Stoga nije ni čudo što od usvojenog prijedloga za otvaranje kancelarije za "istjerivanje ekološke pravice" u dolini Spreče vjerovatno neće biti ništa.

10. 5. 1998.

### Socijalna pomoć od 34 marke

...podijeljena je za mjesec februar takozvanim korisnicima socijalne pomoći, njih 113, koji se nalaze na spisku Centra za socijalni rad u Gračanici. Osim ove kategorije, na posebnom spisku nalazi se još 130 korisnika tuđe pomoći i njege kao i 67 civilnih žrtava rata koji takođe primaju redovnu mjesečnu "prinaldežnost" putem ovog centra.

Uzme li se, međutim, u obzir 7.500 izbjeglih i prognanih, 7.515 nezaposlenih, pretežno bivših boraca, oko 4.000 radnika "na čekanju", te veliki broj onih koji rade, a ne rade, 3.505 penzionera sa mizernim penzijama kao i onih koji na ovaj ili onaj način prose po našim ulicama, tamna slika naše postratne socijalne bijede mnogo je tamnija, a spiskovi socijalno ugroženih mnogo su duži u odnosu na pomenute u gračaničkom Centru za socijalni rad.

10. 5. 1998.

### Odjeci "kosovskog boja"

...koji se ovih dana sve više rasplamsava na takozvanom svetom srpskom prostoru, odakle je Milošević krenuo "u boj za narod svoj", dopiru i do Gračanice. Bježeći ispred genocida i terora srpske policije i paravojske, na hiljade Albanaca traži spasa u Albaniji, Crnoj Gori, pa i u Bosni. Jedna grupa stigla je i u Gračanicu. Najbrojnija je porodica Cakići, koja je potražila utočište kod ovdašnjih svojih sunarod-

nika i rođaka. Radnja balkanskog kasapina radi, dakle, punom parom. Ima li kraja...?

16. 5. 1998.

### Nijaz Omerović - novi šef SDA gračaničke opštine

To je odluka Skupštine SDA koja je, sprovodeći stavove svoje centrale o "razdvajanju funkcija i rasterećenju članova", umjesto Muhameda Ibrahimića, dosadašnjeg predsjednika i načelnika opštine, odlučujući se između predložena dva kandidata - Nijaza Omerovića i Ejuba Hodžića - 43 svoja glasa poklonila Omeroviću, što mu je bilo dovoljno da zauzme tu, dosta odgovornu i ne baš, u sadašnjem predizbornom periodu, pretjerano atraktivnu funkciju - za koju ovoga puta, kao nikada do sada nije ni bilo pretjerane jagme. Tako je najjača politička stranka u Gračanici, umjesto opštinskog načelnika, za svog lidera dobila umjetnika što je, htjeli ne htjeli, rijetkost na ovim prostorima.

Ako ovaj akademski slikar bude uspješan u politici kao u svom fahu, gračanička SDA će profitirati. Hoće li usput i umjetnost imati kakve fajde - ostaje da se vidi.

17. 5. 1998

### Umro Dževad Sarajlić

Rođen je 1936. godine u Gračanici. Učitelj, zatim diplomirani pravnik, privrednik, potom sudija, advokat. Oženjen, jedno dijete, sin... Istaknuti je javni i kulturni radnik. Jedan je od inicijatora i glavnih rukovodilaca gračaničkog ratnog lista "Biljeg vremena". Bio je dugogodišnji član, a jedno vrijeme i predsjednik gračaničkog kulturno-umjetničkog društva "Adem Alić", bio je prdsjednik lokalnog "Preporoda", saradnik je ovog časopisa...

Opširniji portret ovog rahmetlije donosimo u rubrici "Zavičaj" u ovom broju "Glasnika".

20. 5. 1998.

**Džakule i Rašljeva: mali mostovi, velika radost**

U prisustvu brojnih mještana i musafira visokog ranga (što se vojske Federacije BiH tiče, sa najvišim činovima bili su generali Delići: Rasim, komandant zajedničke komande Vojske Federacije BiH, i Sead, komandant 2. korpusa Vojske Federacije BiH, a što se civilnog sektora tiče - s najvišim činom tu je bio premijer u Vladi Tuzlansko-podrinjskog kantona Hazim Vikić kao i ovdašnji lokalni političari na čelu sa gračaničkim gradonačelnikom Muhamedom Ibrahimovićem, među "jabandžijama" svojim epoletama i uniformom isticali su se i oficiri Multinacionalne divizije SFOR-a "Sjever", koje je predvodio major američke vojske major Mek Nissi) stanovništvu ova dva sela, kao poklon za Dan opštine, predana su na upotrebu tri mosta koje su zajednički izgradili pripadnici Vojske Federacije i SFOR-a - preko Džakulske rijeke u centru Džakula i na putu Donja Orahovica - Rašljeva na suprotnoj strani opštine.

Iako je padala kiša, svečano su presječene vrpce, održani su prigodni govori, "radile" su kamere - da "ubilježe" mostove saradnje između moćnog NATO-a i domaće vojske, odnosno njihove simbole i na ovom području.

22. 5. 1998.

**"Gračanički glasnik" - promovisana "petica"**

Promociju je, u prepunoj dershani Osman-kapetanove medrese, obavila dr. Madžida Bećirbegović, profesorica Arhitektonskog fakulteta u Sarajevu.

"Glasnikovoj" petici dala je peticu i pohvalila stvaralački napor Redakcije Časopisa i ovdašnje izdavačke kuće "Monos", a potom održala predavanje na temu "Arhitektura džamija u BiH". Uvodne napomene o džamiji u islamu prethodno je dao glavni imam Odbora Islamske zajednice u Gračanici Fikret eff. Pašanović.

Kao jedan od utemeljitelja Časopisa, Reuf Sokolović je zahvalio autorima "što su nam i ovoga puta omogućili da budemo duhovno bogatiji" i naglasio da će tek budućnost pokazati koliko je vrijednost ovakvih projekata.

Lijep podstrek i ohrabrenje - istinski glas za "Gračanički glasnik".

22. 5. 1998.

**Promotivni nastup KUD-a "Adem Alić"**

...pokazao je punu opravdanost ponovnog pokretanja i oživljavanja rada ovog amaterskog kolektiva koji je nekada, kako reče njegov sadašnji predsjednik Hajrudin Junuzović, "diktirao tempo" svih kulturnih zbivanja u Gračanici. Nastupila je folklorna sekcija, solidno uvježban orkestar, već afirmisani ansambl "Arabeske", recitatori, pjesnici, uskoro će i glumci. Prepuna dvorana Doma kulture i iskreni aplauzi publike, za članove ovog KUD-a više su od podrške - što se tiče "obične raje". Neće je, valjda, nedostajati ni u aktuelnoj vlasti, koja mora imati više nego do sada sluha za ovakve i slične poduhvate. Inače će, uz sve ostalo, morati uvoziti i takozvane kulturne sadržaje - i pored izrazito bogatih domaćih "resursa" u toj oblasti.



24. 5. 1998.

### Međunarodni rukometni turnir "gračanica 98"

...svakako je jedna od najznačajnijih u nizu sportskih manifestacija koje se održavaju u povodu Dana opštine Gračanica. Riječ je, ustvari, o dvanaes-tom po redu, a prvom poslijeratnom rukometnom turniru koji ima međunar-odni karakter. Učestvovala su sljedeće ekipe. "Flori lezobre" iz istoimenog francuskog grada u blizini Orleansa, "Borac" iz Travnika, aktuelni prvak BiH rukometne lige, rukometna ekipa iz Banovića i, naravno, domaćin - "Gračanica -Fering". Sve ekipe su se trudile da pruže kvalitetnu i fer igru, za što zaslužuju posebno priznanje mnogobrojnih ljubitelja rukometa u Gračanici.

Pobjednik ovogodišnjeg turnira je domaća ekipa, koja je u finalnoj utak-mici savladala Banovićane rezultaom 28:21.

25. 5. 1998.

### Dan opštine Gračanica - radno i paradno

Prvo je, u prisustvu brojnih mještana i gostiju, među kojima je bio i predsjednik Federacije BiH dr. Ejup Ganić, pušten u rad veliki rezervoar za vodu od 1.400 kubika na Gaju, inves-ticija od oko 2 miliona DM finansirana iz stranih donacija. Vrpcu su presjekli: Ahmed Smajić, federalni ministar poljoprivrede i Muhamed Ibrahimović, načelnik opštine Gračanica. Potom je položen kamen temeljac za sportsku dvoranu na lokalitetu Bazen u Gračanici, čija je predračunska vrijednost oko 4 miliona DM. Temeljac su položili kantonalni premijer Hazim Vikalo i načelnik

opštine Muhamed Ibrahimović. Zvanično je puštena u rad i Tvornica betonskih prefabrikata Kompanije "Šir-begović", najveća poslijeratna proiz-vodna investicija u Gračanici "teška" 7 miliona DM "firma koja pravi firme", kako je rečeno na otvaranju... Presjecanjem vrpce i simboličnim pritiskom na dugme, fabriku su pustili u pogon uvaženi musafiri: predsjednik Federacije dr. Ejup Ganić, kantonalni premijer Hazim Vikalo i predstavnik USAID-a Džon Herd.

Nema sumnje, lijepi i vrijedni darovi za Dan opštine Gračanica.

Održana je i svečana sjednica Opštinskog vijeća na kojoj je načelnik opštine Muhamed Ibrahimović u svom referatu, između ostalog rekao i ovo: "Iako nismo u potpunosti zadovoljni sa postignutim u protekle tri godine mira, ipak moramo biti realni i svjesni objektivne situacije i okruženja u kojem se nalazimo kako bi i naše ocjene bile realnije. Stoga, u ovakvim prilikama kad se podsjećamo na prošlost, čineći to radi budućnosti, moramo sebi postaviti pitanje - kako dalje. Za razliku od onog jučer, odgo-vor na to pitanje danas nam je mnogo jasniji. Ima puno više razloga da s opti-mizmom gledamo u budućnost. Teškoća i posrtaja na putu izgradnje mira i demokratije bit će još ,mnogo, ali će Bosne biti sve više - jer vrijeme Bosne tek dolazi..."

U drugom dijelu sjednice na svečan način potpisana je Povelja o uspostav-ljanju trajne prijateljske saradnje (o bratimljenju) između Gračanice i ita-lijanskog grada Formia, a sve to, u kulturno-umjetničkom dijelu svečanosti, "začinio" je Gudački kvartet Kamenog teatra iz Sarajeva sa primadonom bosanske sevdalinke Bebon Selimović.

Podijeljena su i tradicionalna opštinska priznanja po sljedećem spisku: Zlatne plakete dobili su: DD "Grin", Odjeljenje odbrane Gračanica i Duraković Besim; Srebrene plakete dobili su: Košarkaški klub "Gračanica 70", Organizacija porodica šehida i poginulih boraca Gračanica, Osnovna škola Lukavica, Prva osnovna škola Gračanica i Zejnilagić Amir; Zlatne značke dobili su: Avdić Galib Babići, Korjenić Sead, Mehurić Bego, Mostarlić Hasan, Salihbašić Muhamed i Spahić Mevludin, svi iz Gračanice; Srebrne značke dobili su: Bećirović Hajrija iz Gračanice, Devedžić Ibrahim iz Lukavice, Đulić Rašida iz Gračanice, Gadžić Rahim iz Prijekog Brda, Jukan Jasmin iz Pribave, Mešić Enes iz Donje Orahovice, Subašić Dževad iz Gračanice i Žunić Muhamed iz Gračanice; Javne pismene pohvale dobili su: Gimnazija "Dr. Mustafa Kamarić", DD "Jadrina", DD "Transport i mehanizacija", Malonogometni klub "Kaskada", mjesne zajednice Malešići i Stjepan Polje, Alić Hajrudin iz Miričine, Girotić Ibro, Ivanišević Katarina i Todorović Ratko, svi iz Gračanice.

25. 5. 1998.  
Izložba "3+1"

...jedna je od zapaženijih kulturnih manifestacija u ovoj sezoni, upriličena takođe u čast Dana opštine Gračanica. Radi se o četvorici slikara koji prvi puta izlažu pod zajedničkom formulom "3+1". To su: Ahmet Hundur (Tešanj), Senad Mahmić (Maglaj), Fuad Čičkušić (Maglaj) i Nijaz Omerović (Gračanica). Iako su različiti po godinama, po koncepciji, tehnici i tematici, oni ipak pokazuju zajednički habitus - zavičajnost i Bosnu. Prema ocjeni kritičara, kako piše Hasan Čalić u "Dnevnom avazu", ovi umjetnici afirmišu "staru dobru štafelajsku sliku" i ovom izložbom ko-

respondiraju sa onim što je aktuelno u sjevernoj Evropi, "a to je povratak slici i figuraciji".

25. 5. 1998.  
"Ugursuz" u Gračanici

Ova predstava Kamernog teatra iz Sarajeva napunila je pozorišnu dvoranu Doma kulture u Gračanici. Glumačka ekipa, na čelu sa izvrsnim Glamočaninom u naslovnoj ulozi, oduševila je gračaničku publiku koja se, izgleda, vraća pozorištu. Predstavu je u povodu Dana opštine sponzorirala gračanička građevinska kompanija "Širbegović", što je, mora se priznati, prava rijetkost među novim gračaničkim biznismenima.

25. 5. 1998.  
Padova darovala četiri autobusa "Avisu"

Posredstvom Humanitarne organizacije "Suncokret" i Komiteta za potporu mirovnih inicijativa, iz italijanskog grada Padove, od tamošnje prevoznice firme "Sita" stigla su još četiri polovna autobusa, koji su kao vrijedna donacija predati na upotrebu gračaničkoj prevoznčkoj firmi "Avis". Prvi autobusi od prijatelja iz Padove stigli su u Gračanicu kad je bilo najteže - ratne 1993. i 1994. godine. Sada ih u voznom parku "Avisa" ima ukupno 10. Dokaz plodne saradnje i prijateljstva Padove i Gračanice.

26. 5. 1998.  
Gračanička privredna delegacija u posjeti Doboju

Delegaciju u kojoj su bili direktori "Fortune", "Olimpa", "Ozrenke", "Kokaprodukta" te predstavnici "Feringa" i "Grafopaka" predvodili su načelnik opštine Muhamed Ibrahimović i njegov pomoćnik za obnovu i razvoj dr. Amir

Baraković. Domaćin im je bio predsjednik opštine Doboj sa predstavnicima nekih tamošnjih firmi. Razgovaralo se o platformi za uspostavljanje privredne saradnje između firmi sa ovih područja, robnoj razmjeni, slobodi kretanja itd. Osim međusobnog upoznavanja (iako su se ovom prilikom susreli i neki stari poznanici), od ovog sastanka ne mogu se očekivati neki konkretniji rezultati zato što se preduslovi za uspostavljanje čvršće ekonomske saradnje moraju stvarati na nekim višim nivoima i još uvijek u sferi neke više, a ne opštinske politike

31. 5. 1998.

"Titanik" uplovio u Gračanicu

Film Jamesa Camerona, dobitnik 11 oscara, "najveći spektakl stoljeća" (u glavnim ulogama: Di Caprio i Kate Winslet) premijerno je prikazan u Gračanicu. Ovaj mamutski filmski spektakl o istinitoj tragediji čuvenog broda "Titanik" izazvao je ogromno interesovanje, razdrmao i razbudio, inače, dosta uspavanu gračaničku filmsku publiku. Ovo je prva projekcija "Titanika" poslije njegove premijere u Sarajevu, pa su se na njegovim predstavama u gračaničkom kinu našli i mnogi ljubitelji filma iz Tuzle i drugih susjednih gradova, što je, svakako, veliki uspjeh gračaničkih "kindžija". Aferim!

1. 6. 1998.

Nema više kuće Hadžića

Srušen je, konačno, i posljednji simbol stare bosanske arhitekture u gračaničkoj "od posla čaršiji", a da niko od "uvaženih čaršilija nije bio nimukaet". Zahvaljujući vremenu i nevremenu, ljudskoj nebrizi i ratu, a prije svega nedostatku volje i nedostatku "odgovornosti odgovornih", smrtna presuda ovom objektu

donesena je vjerovatno mnogo ranije. Nikad nije bilo para za otkup i konzervaciju ovog vrijednog historijskog spomenika, na čijem mjestu već niče još jedan poslovni objekat od betona i stakla, kojem će, vjerovatno, na tom prostoru biti "tijesno", ali će zato donositi pare. Ovi koji su danas na vlasti optužuju svoje prethodnike da su namjerno uništavali arhitektonska jezgra starih bosanskih čaršija, kao ostatke konzervativizma i zaostalosti. Šta li će govoriti oni koji tek dolaze? Ništa...

Uostalom, već smo zaboravili tu staru ohrdinu u centru Gračanice. Zaborav kao sudbina, a poslije – ništa.

3. 6. 1998.

Velika donacija za rekonstrukciju gračaničkog vodovoda

Predstavnici sedam opština Tuzlansko-podrinjskog kantona stavili su svoj potpis na dokument pod nazivom "Memorandum o razumijevanju" koji im je ponudio USAID Business Finance, američka agencija za obnovu i razvoj. Osim predstavnika USAIDA-a, i predstavnika pomenutih opština (Brčko, Gračanica, Kladanj, Teočak, Tuzla, Brčko-Ravne i Živinice), "Memorandum" su kao "garanti" potpisali i predstavnici ambasade SAD i Tuzlansko-podrinjskog kantona. Riječ je o dokumentu "teškom" nekoliko miliona američkih dolara finansijske pomoći za obnovu infrastrukture u pomenutih sedam opština. Sa svoje strane, opštine potpisnice obavezale su se da će dosljedno sprovesti odredbe Dejtonskog sporazuma, posebno one koje se odnose na povratrak izbjeglica.

Prema ovom dokumentu, opština Gračanica dobiva 700.000 dolara za rekonstrukciju vodovodnog sistema u Gračanicu.

Između ostalog, izvršit će se rekonstrukcija dijela vodovodne linije od Sokola do Pašalića, odnosno zamjena dotrajalih azbest-cementnih cijevi (dužine 3.000 metara), zatim rekonstrukcija 2.000 metara cjevovoda u visinskim zonama Varoš, Donji Drafnici i Mejdanić, te zamjena azbest-cementnih cijevi na "potezu" od Doma zdravlja do Štamparije "Grin" i od "Zanata" do "Bazena". Predviđena je i zamjena 3.800 vodomjera i ventila raznih profila, postavljanje raznih elektromagnetnih mjerača protoka vode itd. Bit će to značajni zahvati kojim će se znatno smanjiti rasipanje i gubici vode u mreži. Poslove će raditi neka od gračaničkih firmi, a sve treba da bude završeno do polovine novembra 1998. Da li se time stavlja tačka na restrikcije i "žed" u Gračanici, ostaje da se vidi.

6. 6. 1998.

#### **Nove registarske tablice - gračanički "mmr" ostao "ćima"**

Po svemu sudeći, nakon potpisivanja valjanog ugovora sa federalnim MUP-om i ulaska u veliki posao izrade novih registarskih tablica za motorna vozila u BiH (uvoza skupocjenog repromaterijala), gračaničko preduzeće "mmr", na kraju krajeva ostao će "ćima". Ni krivo ni dužno, ispaštat će goleme materijalne posljedice velikog "zamešateljstva" vodećih igrača Federalnog MUP-a koji su mu dali, a potom uzeli posao. Da se ne radi o slučajnoj greški ili propustu, već o golemoj aferi u koju se pokušava uvući i takozvana međunarodna zajednica, jasno dokazuje međusobne javne optužbe najviših čelnika Federalnog MUP-a, kontradiktorne izjave ministra Mehmeda Žilića i njegovih pomoćnika koje donosi dnevna štampa. U pozadini svega, kao i

uvijek, je golema "lova". Po ovdašnjem receptu, afera će se vjerovatno zataškati, a gračanički "mmr" će tražiti naknadu štete putem suda - koji nikad neće presuditi u njegovu korist. Jer, vrana vrani...

15. 6. 1998.

#### **Gračanica – Petrovo: Razmjena lične dokumentacije**

To je rezultat više obavljenih službenih razgovora između čelnih ljudi ove dvije susjedne opštine (bez posrednika tzv. međunarodne zajednice) koji su učinili korak dalje na uspostavljanju međuentitetske saradnje u odnosu na više nivoe entitetske vlasti. Na području sadašnje opštine Gračanica prije rata radilo je 1.900 radnika koji trenutno žive na području opštine Petrovo. Obrnuto, na području opštine Petrovo radilo je 495 radnika koji se sada nalaze na području Gračanice. Većina je zainteresovana da što prije dobije svoju ličnu dokumentaciju. Dogovorom čelnih ljudi ove dvije opštine, to će im biti i omogućeno.

18. 7. 1998.

#### **Kardinal Puljić - u posjeti Gračanici**

Ovo je prva posjeta Vrhbosanskog nadbiskupa kardinala Vinka Puljića katoličkoj crkvi Velike Gospe u Gračanici. Crkva je sagrađena 1921, a temeljno obnavljana 1969. godine. Sadašnjom akcijom obnavljanja crkve rukovodi ovdašnje Hrvatsko katoličko društvo "Karitas". Svojim donacijama obnovu crkve najviše pomažu Bošnjaci, vlasnici preduzeća, građani, zatim Opštinsko vijeće, gvardijan tuzlanski fra Petar Matanović, grofica iz italijanskog grada Kremone itd.

Nakon obilaska obnovljene crkve, kardinal Puljić se susreo s načelnikom opštine Gračanica Muhamedom Ibrahimovićem, koji ga je informisao o politčko-bezbjednosnoj situaciji i međunacionalnoj toleranciji u ovom gradu. "Drago mi je čuti ove lijepe informacije, da ovdje ljudi žive kao ljudi, svako u svome nacionalnom identitetu i vjerskom uvjerenju, da vole svoj grad i svoje građane i bilo bi mi zadovoljst-



vo da ovakvu klimu možemo stvoriti na svim prostorima u cijeloj BiH", rekao je u tom razgovoru kardinal Puljić, prepoznavši da u ovom gradu "Bosna stanuje od pamtivijeka".

4. 8. 1998. godine  
Kako vratiti Skipovljane

Nakon nekoliko puta najavljivane i nikad nerealizovane posjete izbjeglih Skipovljana opštini Gračanica radi dogovora o stvaranju uslova za njihov povratak kući - za prvog čovjeka Gračanice Muhameda Ibrahimovića pitanje iz naslova ostaje i dalje bez odgovora. To nimalo ne veseli

Bošnjake izbjegle iz modričkog predgrađa Tarevci, jer se u njihovim kućama nalaze pomenuti Skipovljani kojima se, po svemu sudeći, ne žuri nazad...Tarevljani već šestu godinu žive u izbjeglištvu u Gradačcu, željno očekujući povratak svojim kućama. Prije toga Skipovljane treba vratiti u Skipovac, a prije toga sanirati i opraviti njihove kuće, a prije toga pronaći humanitarnu organizaciju koja će dati pare...Prognanicima iz Tarevaca načelnik Ibrahimović obećao je da će se angažavati na stvaranju uslova za dvosmjerni povratak. Srbi u Skipovac, Bošnjaci u Tarevce.

Ali nije, nažalost, samo do njega.

16. 8. 1998.  
Novi vodovod u Stjepan Polju

...za sada je u eksperimentalnoj fazi rada. Ispituju se postrojenja koja crpe vodu iz bunara, dubine od 75 metara. Po svom kapacitetu ovo izvoriste treba da zadovolji potrebe sela za pitkom vodom u narednih 20 godina. Izgrađeni su rezervoari na Brezicima i Avdićima, instalisane pumpe, rekonstrisana mreža, dovedena električna energija... Napokon je uspješno završen cjelokupni projekat vodosnabdijevanja Stjepan Polja, investicija "koja život znači", teška preko 250.000 DM.

Sredstva su obezbijedili donatori, a od sada valja "u se i u svoje kljuse", kažu neki Stjepopoljci.

19. 8. 1998.  
Holding "Širbegović" – u elitnom društvu

Od 20 najuspješnijih firmi u Federaciji BiH, ova gračanička građevinska kompanija sa 280 zaposlenih i blizu 1,2 miliona DM ostvarene dobiti u prošloj godini, zauzela je solidno 11. mjesto na rang-listi uspješnih. Iza sebe

je ostavila gradačačku "Bosnu", "Kopeks Sarajlić", "Bosna lijek", "Vranicu" i još nekoliko uspješnih i prestižnih firmi u Federaciji. I po ostvarenom izvozu, "Širbegović" je među dvadeset najboljih. Sa izvozom od blizu 3,8 miliona DM zauzeo je 16. mjesto.

I ostao prva liga BiH građevine.

21. 8. 1998.

### **Puštena u rad tri elektroenergetska objekta**

Riječ je o trafostanici Gračanica 110/35 KW i dva 110 KW dalekovoda: Gračanica-Doboj i Lukavac-Srebrenik. Time se realizuje dio projekta sanacije 110 kilovoltnog dalekovoda Tuzla kojim se osigurava pouzdanije snabdijevanje ovog dijela BiH električnom strujom. Izvori sredstava za sanaciju tih objekata su: Elektroprivreda BiH (260.000 KM), humanitarne organizacije (480.000 KM) i kredit Svjetske banke (77.000 KM).

"Tek nakon sanacije ovih objekata može se govoriti o ozbiljnijem pokretanju privrede na ovim prostorima", rekao je na skromnoj svečanosti tim povodom načelnik opštine Gračanica Muhamed Ibrahimović, napomenuvši da čin puštanja i završetka sanacije ove trafostanice za Gračanicu ima posebnu simboliku – prva granata sa Ozrena pogodila je upravo ovaj objekat negdje početkom aprila 1992. godine, kad smo se još nadali da će nas rat nekako zaobići.

23. 8. 1998.

### **U Gračanici – konačno hotel**

Kreditnim aranžmanom sa građevinskom firmom "Gromeks" iz Brijesnice (u kojem se devastirani objekat motela sa zemljištem pojavljuje kao

garancija), DD "Park" je stvorio uslove za potpuni sanaciju i dogradnju hotela u centru Gračanice. Izvođač radova, koji se obavezao da će objekat završiti do kraja ove godine, već je ušao u posao. Vrijednost radova je, kako kaže novi direktor DD "Park" Kemal Helić, oko 980 hiljada DM i pare vjerovatno neće biti problem.

Kako je krenulo, Gračanica će u Novu godinu ući sa novim hotelom sa tri zvjezdice koji će imati 22 sobe sa 44 ležaja i dva apartmana, veliku salu sa 140 mjesta, šank-bar, savremenu kuhinju i vlastiti parking...

Ljepši novogodišnji poklon ova čaršija ne pamti.



Ni potrebniji...

13. 9. 1998.

### **Kardinal Puljić – u Gračanici drugi put**

Nakon nepuna dva mjeseca ovaj velikodostojnik katoličke crkve ponovo je posjetio Gračanicu. S razlogom: u obnovljenoj katoličkoj crkvi u centru grada služio je svetu misu i održao prigodan govor okupljenim vjernicima i

drugim građanima Gračanice među kojim je bio i načelnik gračaničke opštine Muhamed Ibrahimović. U svom govoru, prema pisanju "Večernjih novina", uzoriti kardinal je između ostalog rekao da je obnovljena crkva simbol sloge i zajedničkog izgrađivanja života i mira u ovoj zemlji. Pozvao je prisutne da budu istinski graditelji života u našoj različitosti, na ovoj grudi gdje smo nikli i obikli, sa željom da se na toj grudi svi osjećamo kao kod svoje kuće.

U Gračanici i ne može drugačije.

13. i 14. 9. 1998.

Drugi poslijeratni opšti izbori u BiH

...održani nakon velike halabuke, po nekima opet istorijski ili historijski (kao da je malo povijesti na ovim prostorima), protekli su, i ovoga puta, pod "paskom" međunarodne zajednice, srećom bez incidenata i nepredviđene gužve i na području gračaničke opštine. Najzapaženije promotivne skupove imala je i ovoga puta Koalicija za cjelovitu i demokratsku BiH (SDA, Stranka za BiH, Građanska demokratska stranka i Liberalna stranka) i SDP koja je nastupala samostalno u čitavoj BiH. Predizborni karavan, začinjjen pjesmom i igrom, osmjesima, hvalisanjem, obećanjima (uglavnom bez pokrića) i patetičnim govorancijama domaćih političara "različitog ranga i fele", protutnjao je svim većim naseljima gračaničke opštine, uz obaveznu manje ili više zanimljivu završnicu u centru "gospodstvenog grada Gračanice", kako ovu čaršiju, udvarajući joj se, nazvaše neki gostujući političari, ubijede ni da će za njih "listom" glasati. "Ispaljivane" su razne parole i slogani, koje će, kao i predizborna obećanja, "prekriti ružmarin, snjegovi i šaš". Možda će, ipak, u nešto dužem sjećanju ostati

borbeni poklič "Smrt nacionalistima!" predsjedničkog kandidata SDP Gradimira Gojera, zbog koje su mu najveće zamjerke uputili oni "koji to nisu".

Najteže je, ipak, bilo novinarima, posebno u takozvanim državnim sredstvima informisanja. U isto vrijeme morali su udovoljiti zahtjevima stranaکا, vlasti i međunarodnih posmatrača, ali i zahtjevima svojih "konzumenata". Radio-Gračanica je dobila pohvale od svih.

Po ocjeni mnogih, i na gračaničkoj opštini primjetan je mnogo organizovaniji i ofanzivniji nastup SDP i izvjesno uzmicanje Koalicije. Ovdje su se konačno "instalirali" i Socijal-demokrati tuzlanskog gradonačelnika Selima Bešlagića. Po svemu sudeći, ozbiljno razigravanje "desit će se" samo između Koalicije CD i SDP. Na potezu su birači.

Glasalo se i ovoga puta na 24 glasačka mjesta, 4 u Gračanici, dva za muhadžire (takozvano glasanje u odsutnosti) i po jedno u svakoj sadašnjoj mjesnoj zajednici.

Zvanične rezultate i ovoga puta saopštiti će neizbježni OSCE, al' "ne zna se kaće".

16. 9. 1998.

Hej, drumovi...

Kako je javio Omer Delić za Radio-Gračanicu, u toku su radovi na rekonstrukciji nekoliko regionalnih i lokalnih puteva na području opštine Gračanica. Na regionalnom putu Donja Orahovica - Gornja Orahovica - Falešić - Srebrenik privode se kraju radovi na asfaltiranju dionice od Gornje Orahovice do Čekanića, a u toku su i pripremni radovi za asfaltiranje puta Džakule - Biberovo Polje.

Donacijama stranih humanitarnih organizacija vrši se intenzivna popravka lokalnih puteva u Vranovićima, Rašljevi, Doborovcima, Lukavici i Donjoj Orahovici. To je, međutim, nedovoljno. Stanje lokalne putne mreže i dalje je izuzetno teško. Sistemskog rješenja za njeno održavanje nema ni na pomolu. Sudeći po tome, "drumovi će poželjet putara, al' putara nigdje biti neće..."

17. 9. 1998.

Ko to tamo puši...

Što se tiče širenja, upotrebe i konzumiranja opojnih droga i Gračanica je, izgleda, sve više u svjetskom trendu. Zvaničnih podataka, pogotovo pouzdanih o tome nema, od nezvaničnih - boli glava. Među "hašišarima", kako se šapuće, prednjače djeca iz vrlo uglednih i bogatih gračaničkih porodica. Kako tome zlu stati u kraj? Kažu, teško. Najgore je što se i ne pokušava ili se to ne vidi. Posla ima za sve, od porodice i škole do policije i bolnice. Odakle početi? I dok se nadležni hvataju za glavu i traže odgovor na to pitanje, u ovom kraju osim konzumiranja i trgovine drogom - počinje i njena proizvodnja - svakim danom u sve većim količinama. Mini plantaže "blaženog cvijeća" već su otkrivene i "razbucane" u Maloj Brijesnici. Ali nije samo Brijesnica...

18. 9. 1998.

U Gradačac se "vratio" Hasan Kikić

Nije na potpisniku ovih redova da se bavi pitanjem da li je Hasan Kikić, naš poznati zavičajni, bošnjački i bosanski književnik bio dobrovoljno (objektivno) ili "pod moranje" neko vrijeme odsutan iz svog rodnog, a našeg komšijskog grada Gradačca i zašto je ime tog najpoznatijeg učitelja

Bošnjaka usred rata "skinuto" sa najstarije osnovne škole u Gračanici zajedno sa još nekim ovakvim ili onakvim imenima škola, ulica, ustanova... Tom sirotom našem učitelju savremeni (suvremeni) hrvatski književni povjesničari ionako su već dali dostojno mjesto u korpusu hrvatske književnosti. Ali to je za neki drugi i drugačiji eglen.

Šta to ima veze sa Gračanicom? Ima, jer je Hasan Kikić sa ponovnim oživljavanjem i održavanjem 19. po redu Kikićevih susreta u Gradačcu - ustvari ponovo ušao na velika vrata Bosne. Ušao je i na stranice rubrike "Riječ" ovog broja "Gračaničkog glasnika". A u Gračanicu, "mi ne znamo ka' će".

19. 9. 1998.

U Babićima počela gradnja društvenog doma

...u koji će biti uloženo oko 240.000 KM. Pare će obezbijediti mjesna zajednica i opština Gračanica, a očekuje se pomoć i od Vlade Tuzlansko-podrinjskog kantona. U prvoj fazi bit će izgrađeni prostori za takozvane opšte-društvene namjene, a u drugoj poslovni prostori za kojim u Babićima, kako reče predsjednik Savjeta ove mjesne zajednice Galib Avdić, vlada veliki interes. Sa izgradnjom ovog objekta centar Babića dobiva sasvim drugačiji izgled i prerasta u malo poslovno i urbano jezgro tog sela.

21. 9. 1998.

Otvoreno SOS Kinderdorf Selo u Gračanici

Kamen temeljac za izgradnju ovog dječijeg naselja postavljen je 17. oktobra 1996. godine, a prve svoje žitelje primilo je krajem februara ove godine. Izgrađeno je 17 kuća u tradicionalnom

bosanskom stilu iznad nekadašnjeg gračaničkog izletišta Gaj. U njima će svoj topli dom, sve dok ne stanu na svoje noge, imati 72 djece bez roditelja, dvadeset petoro već je smješteno u te prekrasne objekte, uskoro se očekuju i ostali, takozvane SOS mame i SOS tete već su tu, kompletira se i ostali personal, najnovije i najljepše gračaničko naselje već je počelo da živi.

Povodom otvaranja naselja održana je prigodna svečanost koju su uveličali brojni visoki gosti, među kojima i kopredsjedavajući Vijeća ministara BiH Haris Silajdžić, generalni sekretar SOS Kinderdorf internacional Ričard Pihler, Hazim Vikalo, premijer vlade TPK i mnogi drugi.

“Ovaj veliki poduhvat, ova ulaganja naših prijatelja iz svijeta – nas itekako obavezuju. Život ove velike porodice neće se odvijati samo u krugu Dječijeg Sela. Njegovi mali stanovnici, budući odrasli ljudi, bit će sastavni dio ove sredine, ove mahale, ovog grada. Oni će odrastati u našem kulturno-civilizacijskom, obrazovnom i sportskom ambijentu. Na nama je da ih istinski prihvatimo kao svoje. Oni za nas nijednog trenutka nisu i ne smiju biti tuđini”, poručio je u svom prigodnom govoru prilikom otvaranja SOS Kinderdorf naselja u Gračanici načelnik opštine Muhamed Ibrahimović.

Za kvalitet izvdeneih radova mnoge pohvale na ovoj svečanosti s razlogom su upućene i izvođaču radova i realizatoru ovog velikog projekta – gračaničkoj građevinskoj Holding kompaniji “Širbegović”, koja je, kao i mnogim drugim slučajevima, na najbolji način ovjerila svoje izvanredne profesionalne reference.

23. 9. 1993.

## Vrijedne donacije Domu zdravlja Gračanica

...u vidu medicinske opreme za anesteziju, hirurgiju, ginekologiju, očno odjeljenje i hitnu pomoć uručili su predstavnici Humanitarne organizacije “Human Rilif internacional” iz Saudijske Arabije. Kako je javio Radio-Gračanica, ova donacija “teška” je više od milion maraka, a gračanički Dom zdravlja je korak bliže ka sticanju statusa opšte bolnice.

24. 9. 1998.

## Kuće za prognanike

Od 150 kuća za prognanike na Tuzlasno-podrinjskom kantonu iz projekta holandske vlade, 13 kuća gradi se na području opštine Gračanica. Kako je javila Zada Jukan u jednoj informativnoj emisiji Radio-Gračanice, pet kuća gradi se na području Rašljeve, a po četiri u Miričini i Lukavici. U njih će se smjestiti 130 prognanika koji se trenutno nalaze u kolektivnim centrima. U tim kućama, naravno, čekaju ih bolji uslovi i podnošljiviji život do konačnog povratka svojim kućama.

26. 9. 1998.

## Sajam male privrede u Doboju

...koji se drugi puta održava u tom gradu “u onom anam entitetu” posjetilo je više Gračanlija-znatiželjnika, ali i nekoliko uglednih privrednika u okviru zanatsko-uslužne zadruge “Tehnozad” koji svoju šansu vide u međuentitetskom privrednom povezivanju. Privrednici su uvijek bili ispred političara. Hoće li i u ovom slučaju tako biti? Sudeći po atmosferi na ovom sajmu, uspostavljenim novim ili obnovljenim starim poslovnim vezama, izgleda da hoće.

28. 9. 1998.

## Ponovo raste broj izbjeglica u Gračanici

To je posljedica neorganizovanog, nepripremljenog i najčešće prisilnog povratka naših izbjeglica iz Njemačke i drugih zapadnoevropskih zemalja. Kako je javio Radio-Gračanica, njihov broj se za kratko vrijeme sa 7.000 povećao na 7.500. Pošto ne mogu svojim kućama u Doboju, Sjenini, Modriči, Grapskoj i drugim mjestima u "onom entitetu", svoje privremeno utočište nalaze u Gračanici, najčešće plaćajući visoke kirije, pošto drugog smještaja nema... Na pitanje kad će moći svojoj kući, niko im u ovoj zemlji ne može odgovoriti. Prognaničke muke bez granica i dalje se nastavljaju na ovim prostorima. A zima dolazi...

1. 10. 1998.

## Kako suzbiti nezakonit rad

Saznanje da na području opštine Gračanica bespravno radi 130 privrednih subjekata (ili statistički, više od 10%) potaklo je opštinsko rukovodstvo da se ozbiljnije pozabavi pitanjem sve masovnijeg kršenja zakonitosti, posebno u oblasti tržišta, rada i radnih odnosa. Preduzete su odgovarajuće mjere iz takozvanog "državnog arsenala" da se stanje koliko-toliko popravi. Pozvane su i prozvané inspekcije - opštinske i kantonalne i usput utvrđeno da se u nekim "segmentima" njihova nadležnost prepliće, pa se međusobno "iščekuju" dok ljudi rade "svoj posao" - od međukantonalne pijace "Arizona" do gračaničke zelene i stočne pijace i dalje. Doista široko polje djelovanja - i za druge odgovorne faktore u ovoj državi, a ne samo za inspekcije.

7. 10. 1998.

## Prokleta je Amerika...

Mada zvanični organi, ne znamo zbog čega, nerado objavljuju podatke

o broju zainteresovanih za odlazak (iseljenje) u prekontinentalne zemlje, novinar Radio-Gračanice Omer Delić iz pouzdanog izvora "iščepkao je" i na radiju objavio podatak da je do sada 100 lica s područja opštine Gračanica podnijelo zahtjev za iseljenje u Ameriku, Kanadu ili Australiju, - "sa tendencijom povećanja broja tih zahtjeva". Kad jednom odu, ljudi obično stvaraju uslove i u "obećanu zemlju" pozivaju svoje bližnje rođake i komšije...

Opšte je mišljenje da se na taj korak odlučuju samo izbjegla i raseljena lica - koja su izgubila svaku nadu u povratak kući. Iznenaduje podatak, međutim, da se u 80% slučajeva na taj "put bez povratka" odlučuje domicilno stanovništvo, uglavnom mlada godišta, 90% demobilisani borci. U pitanju su, mahom, ekonomski razlozi.

"Iz Gračanice odlaze ljudi sa kompletnim porodicama, što je činjenica pred kojom se nadležni moraju zamisliti", zaključuje Omer Delić. I valjda preduzeti nešto konkretno jer - prokleta je Amerika...

16. 10. 1998.

## Kad proleti muha iznad žice...

Svakodnevne informacije o puštanju u pogon više kapitalnih elektro-energetskih objekata (naročito pred ovogodišnje izbore), mnogobrojni potrošači električne energije u selima sjeverno od Gračanice doživljavali su kao grubu i neslanu šalu na svoj račun (da ne upotrijebimo riječ koja "nije za novine"), suočeni sa žalosnom stvarnošću svoje elektrifikacije: "Puhne vjetar - nema struje". O tome su pisale i novine, a zvanični predstavnici "Elektrodistribucije" na sastanku kod načelnika opštine Muhameda Ibrahimovića demantovali:

kad proleti muha iznad vodova i jače "zamahne" krilima onda nestaje struje, a kad puhne vjetar – nastaju veće havarije. To su, naravno, posljedice.

Da bi se normalizovalo snabdijevanje strujom, na području opštine Gračanica (i Doboj Istok) potrebno je ugraditi 102 trafostanice, od čega, prema rangiranju "Elektro distribucije", 15 pripada kategoriji "urgentno", 26 kategoriji "vrlo hitno", 30 "hitno" i 31 "potrebno". Ali para nema, ni po kojem rang. Za poboljšanje snabdijevanja strujom predstavnici "Elektro distribucije" ponudili su projektovanje, stručnu radnu snagu i specijalizovanu mehanizaciju, "a oni koji su zainteresovani za izgradnju trafostanica trebaju obezbijediti sredstva za nabavku repromaterijala", a potom, je li, kupovati struju od "Elektro distribucije" po tržišnim cijenama.

Neki predložiše da po ovom "genijalnom modelu" i gračanički pekari izvrše rekonstrukciju svojih postrojenja. Obezbiđedit će projektovanje, stručnu radnu snagu i specijalizovanu mehanizaciju, a oni koji su zainteresovani za hljeb obezbiđedit će sredstva za nabavku repromaterijala, a potom od tih istih pekara kupovati hljeb po tržišnim cijenama - koji je ipak preči od struje. Stoga će gore spomenuti potrošači električne energije, to jest kupci, još dugo čekati novu elektrifikaciju ukoliko opet "ko nekad" sami ne zasuču rukave - i ne daju pare.

"O tempora o mores".

2. 11. 1998.

Kompletiranje "nove" vlasti TPK

...odvijalo se sa dosta dramatike, iznenađenja, grubih faulova i lobiranja, principijelnih i neprincipijelnih

istupanja, s dosta optužbi na račun protivnika, osluškivanja habera sa više instance... Sve u svemu, možda interesantnije nego sami izbori. I sve to unutar pobjedničke Koalicije za cjelovitu i demokratsku BiH. Opoziciju gotovo niko nije ni spominjao.

Napokon, za predsjednika Skupštine TPK izabran je prof. dr. Izet Žigić (Stranka za BiH), a za guvernera (predsjednika) TPK dr. Tarik Arapčić, dosadašnji čelni čovjek kantonalnog rukovodstva SDA. Žestoka bitka za premijersku i ministarske fotelje bit će još nekoliko dana tema dana na političkoj sceni TPK. Za čelnog čovjeka Vlade Kantona "u igri" su čak 4 kandidata, među kojima i dosadašnji premijer, Gračanlija Hazim Vikalo.

5. novembar, 1998.

Oživljavanje tradicionalne bosanske grnčarije

...na prostoru gračaničke opštine, konkretno na prostoru sela Malešića, dio je projekta Evropske zajednice pod nazivom ECOS OUVERTURE 1998-2001, koji je podržalo opštinsko načelstvo i načelnik opštine Muhamed Ibrahimović potpisao prve pristupne aplikacije. Riječ je o projektu oživljavanja tradicionalne grnčarije u BiH, konkretnije osnivanju Centra za obuku i podršku mreže grnčara na području TPK, koji bi se razvijao na prostoru sela Malešića. Bio bi to jedan od tri takozvana centra tradicionalne grnčarije u Evropi koje će finansirati zainteresovane evropske, pretežno britanske firme.

Za Malešiće i za Gračanicu, osim kulturološkog, realizacija ovog projekta mogla bi biti od izuzetnog ekonomsko-turističkog i razvojnog značaja.

Realizacija ovog projekta "ide" preko britanske nevladine organizacije BHHR (Bosnia Herzegovina Heritage Rescue), koja od 1993. djeluje u Londonu, a njen ured od 1986. u Sarajevu. Glavni njen zadatak je programiranje i imlementacija organizovane podrške institucijama i ustanovama kulture u zaštiti kulturnog i prirodnog naslijeđa BiH. Prema riječima direktora Ureda BHHR u Sarajevu gosp. Asima Đonlića, ova organizacija je uspješno do sada realizovala više od 20 projekata u BiH. Realno je očekivati da će i program "grnčarije" na području Gračanice uspjeti - tim prije što već ima podršku i Gračanlija i Malešana.

I još jedna napomena: Program "grnčarije" na ovom prostoru kao prvorazredan kulturološki, ali i ekonomski poduhvat, od samog starta imat će podršku ovog časopisa.

16. novembar, 1998.

**Gračanlija Hazim Vikalo - ponovo predsjednik Vlade TPK**

Izborom Gračanlije Hazima Vikala, starog premijera, na čelo nove vlade TPK završeno je drugo, po mnogima, puno uzbudljivije poluvrijeme ovogodišnje izborne utakmice na TPK.

Između više kandidata, na prijedlog novog guvernera Tarika Arapčića, inženjer Hazim Vikalo dobio je najjaču podršku.

Nekoliko podataka iz biografije novog (starog) premijera: Rođen je 29. 11. 1960. godine u selu Sladna, opština Srebrenik. Osnovnu školu i gimnaziju završio je u Gračanici, a 1983. diplomirao na Elektrotehničkom fakultetu u Tuzli.

Kao inženjer elektrotehnike, nakon završenog školovanja, 4 godine radio je kao odgovorni projektant u gračaničkom "Feringu", a zatim preuzima dužnost direktora u

preduzeću "Projekt" Gračanica.

Svoje prvo političko angažovanje započeo je nakon formiranja SDA u Gračanici kao jedan od njenih osnivača i prvi potpredsjednik.

Na dužnost predsjednika opštine Gračanica dolazi nakon ostavke svog prethodnika krajem septembra 1991. godine, kada je rat već bio na vratima Bosne. Nakon nekoliko mjeseci svog mirnodopskog mandata, kao predsjednik Ratnog predsjedništva organizuje odbranu i rukovodi otporom protiv agresora na prostoru gračaničke opštine i na prostorima koji će kasnije dobiti naziv Doboj Istok. Jedan je od inicijatora čvršćeg povezivanja opština i sinhronizovanja odbrambenih napora na prostoru Tuzlanske regije početkom rata. Bila je to osnova za formiranje Okruga (u kojem je duže vremena obavljao funkciju potpredsjednika), a kasnije i za konstituisanje prvog kantona u BiH.

Kao predsjednik Ratnog predsjedništva, potom i načelnik opštine Gračanica, vrlo uspješno je uspostavljao i organizovao sve funkcije civilne vlasti nastojeći da privredni život funkcionise i u najtežim uslovima. Tako je stvarana logistička podrška OG-2 (kasnije 22. diviziji) i njenim jedinicama koje su branile slobodne prostore Gračanice na liniji dugačkoj blizu 60 kilometara. Rezultat: nikad agresorska noga nije kročila ni u jedno bošnjačko naselje gračaničke opštine.

Odlikuje ga upornost, konstruktivnost, strpljenje i smisao za kooperativnost i timski rad.

Te su njegove odlike došle do punog izražaja i na funkciji prvog čovjeka u Vladi TPK. Posebno se angažovao na oživljavanju privrede ove regije, pokretanju velikih proizvodnih investicija i sanaciji kapitalnih energetskih i infrastrukturnih objekata na TPK.

To je vjerovatno bila odlučujuća referensa i razlog što mu je po drugi put povjerena ova odgovorna funkcija.